

## Zjawny list prezidenteje sejma

**Njebjelčicy.** Ze zjawnym listom je so iniciatiwa Serbski sejm na prezidenta Sakskeho krajneho sejma wobročila. Hladajo na nowelu sakskeho šulskeho zakonja, kotruž sejm runje wobjednawa, skedźbnjeja iniciatiwnicy na to, zo nastupa šulski zakon „tež serbski lud; kubłanska politika je elementarny aspekt prawa na samopostajowanje kóždeho ludu“. Zdobom na to pokazuja, zo je serbski lud „aktualnje we wažnym procesu, sej měnjenje tworić nastupajo skutkowne a legitimowane zastupnistwo swojeho prawa na samopostajowanje“. W tym zwisku žada sej iniciatiwa wosebitu formulaciju nastupajo pomjenowanje zastupjerja serbskeho ludu při nowelěrowanju šulskeho zakonja. Tak namjetuje za paragraf 41 slědowace wudospołjenje: „Na serbskich šulach ma so tež Serbske šulske towarstwo respektiwne – po swojim konstituowanju – wot demokratisce legitimowaneho zastupnistwa Serbow pomjenowany zastupjer słyšeć“. Rěčnikaj iniciatiwy dr. Měrćin Wałda a Hanzo Wylem-Kell staj list podpisałoj.